




NOVITADS DA SCOLA

UOST 2020

Prezai geniturs, prezai interessai

Ins sto buca adina ir el lontan per cattar il bi - biars vegnan ad haver fatg persenn quei, havend passentau muort la situaziun speciala las vacanzas da stad en tiara nossa ni en la regiun. Forsa haveis scuivert loghens tochen uss a vus nunenconuschents? Forsa haveis anflau ina nova occupaziun preferida? Jeu sezza sun dil meini che nus habiteschien en in dils pli bials loghens ch'ins sa s'imaginar e sundel gest en quei temps engrazieivla d'astgar guder il privilegi da viver cheu. Stuer star e reflectar tgei ch'ins ha gia ha era sias bunas varts.



Péz Tumpiv e Cavistrai (Foto: Lotar Tomaschett)

En tgei fuorma e nua era adina - jeu sperel che vus e nos scolars hagies saviu guder il temps da stad. Il niev onn da scola ei arrivaus e quel empermetta puspei in program variont. Bugen less jeu dar ina cuorta survesta dalla planisaziun pigl emprem semester.

Davos mintga scola stat im gremi strategic: il Cussegl da scola. Mo tgei fa quei cussegl propi? E tgi ein las personas che stuttan davos quel? Ei vegn uras da presentar a vus nies Cussegl - ed igl entir Consorzi!

Ulteriuras informaziuns ed actualitads davart nies consorzi anfleis Vus sco adina sin nossa pagina d'internet (www.scolasumvitgtrun.ch).

Salids cordials

Erica Cavegn-Pfister
Presidenta dil Cussegl da scola



NOVITADS DA SCOLA

ACTUALITADS

Program da scola emprem semester

In onn da scola cuntegn adina in program pulpiu cun da tuttas sorts occurrentzas - ed ei ha per mintgin enzatgei!

Pil Cussegli da scola stattan projects da svilup en consequenza dall'evaluaziun inspectorala - che han muort Corona stuiu vegnir spustai - el center digl emprem semester. Ferton che las partiziuns primaras sefatschentan internamein cun cooperaziuns d'emprender collegialas, enquera il scalem superieur pusseivladads per megliurar il clima da scola sin lur scalem. Attribuir ad in bien clima da scola san denton buca mo las personas d'instrucziun, mobein era scolarAs e geniturs. Ord quei motiv vegnan era tuttas gruppaziuns pertuccadas involvadas en quest process, cun la finamira da promover il plascher e la motivaziun ed aschia megliurar il clima sin scalem superieur.

Per las personas d'instrucziun porschan las jamnas da project en la superiura ina buna pusseivladad da sedar giu intensivamein cun in project e cun lur scolarAs. L'emprema superiura s'occupescha uonn cun il tema emprender: emprender d'emprender ei la finamira. La secunda superiura astga nezzegiar quels gis da far fuffergnadiis per survegnir in'investa en ina ni l'autra professiun e per sentir in techet il puls dil mund da lavur. La tiarza superiura sededichescha alla lavur cumina cun la finamira da rimnar daners per lur viadi da finiziu. In'jamna intensiva, denton per tuts fetg enrihonta spetga pia els!

In punct culminont ord vesta dallas scolaras e dils scolars ein segir ils viadis da scola. Tut tenor meina quel ils affons en cantuns aunc nunenconuschents da nossa regiun, ni era sur quella ora. Aventuras singularas, experientschas stablas ni semplamein grond divertiment spetga las scolaras ed ils scolars quei gi. Aunc fuss ei memia bauld da tradir tgi che astga uonn ir nua, denton ei il plascher anticipau enconuschentamein il pli bi plascher!

Medemamein egl emprem semester han per regla ils gis da viseta liug. Nuslein seccapescha era bugen porscher uonn a vus quella pusseivladad da prender investa dil menaschi da scola e d'accumpignar ils affons in mumenet en lur mintgagi scolastic. Cunquei che nus sesanflein denton aunc adina en ina situaziun malguessa concernent il virus da Corona, vegnan quels gis spustai sin la primavera cun la speranza da saver porscher lu a moda realisabla las visetas.

Nova purschida: tgira cumplementara alla scola

Il basegns per structuras dil gi el Consorzi ei mai staus aschi gronds ch'el vess tenor lescha obligau nus da porscher talas structuras. Quei lein nus midar.

Cun l'entschatta dil niev onn da scola han ils affons dil Consorzi la pusseivladad da passentar lur miezgi ni suentermiezgi en la canorta d'affons Lumpazi a Mustér. La canorta porscha ina survigilonza professiunala per gentar, suentermiezgi e durond las vacanzas da scola per tuts affons da scola e scoletta. Entras ina cunvegna cun la canorta possibilitescha il Consorzi als geniturs da far diever da questa purschida per in prezi adattau.

Ils affons san vegnir annunziai directamein e da tut temps alla canorta. Il transport ei caussa dils geniturs, vegn denton organisaus entras la menadra dalla canorta.

Per ulteriuras informaziuns astgeis sedrizzar directamein alla canorta Lumpazi Mustér:

CONSORZI DA SCOLA SUMVITG-TRUN




NOVITADS DA SCOLA

TEMATICA

Cussegli da scola - tgei ei quei?

Mintga scola basegna in gremi strategic ch'ei responsabels per la direcziun en la quala la scola vul semover. Quella funcziun surpren il Cussegli da scola.



Versiun: 07-2020

Nies Cussegli da scola secumpona d'ina presidenta e da 5 ulteriurs commembers, che vegnan elegi dallas vischynauncas per 3 onns.

Il Cussegli elegia e relai il menader da scola, sco era tuttas persunas d'instrucziun. El fixescha il pensum dallas persunas d'instrucziun, organisescha ils transports da scola e las purschidas supplementaras. Il cussegli ei era responsabels per tuts reglaments ed uordens dil Consorzio. El prepara ed approbescha il quen ed il preventiv per la scola e presenta quel allas vischynauncas.

Il Cussegli da scola ei adina sil current arisguard quei che succeda en scola. El decida en differents cass pertucont las scolaras ed ils scolars (admisiuon, mesiras da pedagogia speciala, mesiras disciplinaras etc.), ei instance da recuors en connex cun decisiuns dispeiteivlas e separticipescha alla sligiaziun da conflicts denter differentas partidas. Il Cussegli da scola pren era encounter damondas e giavischs da scolars e geniturs ed intermediesch sche necessari.

Il Cussegli da scola representa il Consorzio anoviers ed ei il ligiom tier las autoritads supremas. Plinavon eis ei pensum dil Cussegli da scola d'informar la publicitat concernent il menaschi - in pensum che nus empruvein d'ademplir denter auter cun questas novitads!

CONSORZI DA SCOLA

SUMVITG-TRUN



NOVITADS DA SCOLA


TEMATICA

Meinascola - ina laver pretensiura

Sper in gremi strategic basegna ina scola era d'in gremi operativ. Cuntrari al gremi strategic che consista da pliras persunas, consista il gremi operativ pil pli mo ord ina persuna: il meinascola.

DER SCHULLEITER

ALS ...



Il meinascoala ei en prinzipi nuot auter ch'il meinagestiun d'ina scola. El ei responsabels per quater camps da laver: la direcziun pedagogica, la direcziun dil personal, la direcziun administrativa ed organisatorica e las finanzas.

La gronda part dallas lavurs dil meinascola ein lavurs d'organisaziun ed administraziun: planisaziun ed uraris, program da scola, repartiziun da classas ed organisaziun dallas localitads per mo numnar entginas lavurs sin quei sectur. La direcziun da personal cuntegn denter auter la planisaziun dil personal e l'organisaziun da substituziuns, la controlla che l'incumbensa professiunala da tuttas persunas d'instrucziun vegn ademplida, discours da personal, sco era la planisaziun e coordinaziun da formaziun supplementara.

Il meinascola ei era responabels ch'il preventiv vegn tenius en e sa far expensas en rama definada. Sil camp dalla direcziun pedagogica cumpeta al meinascola la responsabladad per il svilup della scola ed el assista a projects pil svilup da tala. El fa visetas

ell'instrucziun e promova la collaboraziun denter tuttas persunas engaschadas.

Il Consorzi ha engaschau da niev duas persunas pil post da meinascola. En quei mument eis ei impurtont da sparter ils camps da laver denter las duas persunas engaschadas per scaffir claras responsabladads. Aschia surpren Caroline las finanzas e la direcziun dil team primara Trun. Salvatore ei responsabels per la direcziun pedagogica e pil team primara Rabius. Pil team superior surprendan els communablamein la responsabladad. Cunquei ch'els fan omisdus sper la laver da meinascola part a quei team, duei aschia vegnir evitau conflicts d'interess. La direcziun administrativa ed organisatorica surpren mintgin per siu camp da laver.

Il Consorzi sepresenta: Corsin Gadola - Cussegli da scola



Gest in onn sundel jeu ussa commember dil Cussegli da scola dil Consorzi da scola Sumvitg-Trun. Miu num ei Corsin Gadola ed jeu habiteschel cun mia dunna e nos dus affons da scola a Rabius. Nus havein midau casa il 2016 naven da Cuera anavos ella biala Surselva. Professiunalmein lavurel vinavon a Cuera tier RTR sco responsabel da tecnologia. Leu sundel responsabels per ch'ils sistems tecnics funcziunan, quei era cun menar projects per remplazzar quels sistems.

Sco cusseglier emprovel da contribuir cun mia savida tecnica sco era professiunala ad in svilup positiv e persistent da nossa scola ch'ei per mei in menaschi fetg impurtont per nossas vischnauncas e nossa regiun. Il pensum da nossa scola ei da preparar nos affons e giuvenils buca mo sin lur professiun, mobein era da dar in buna basa per ina veta cun satisfacziun.



NOVITADS DA SCOLA

INFORMAZIUNS

Truffels per in e scadin!

La tiarza superiura cultivescha sco project da classa in er da truffels (Agria/Desiré/Charlotte) tenor las prescripziuns da bio. La finamira ei da veser tgei laver che s'auda tier la producziun da maglias ed era da recalgar daners per lur viadi final. Tgi che ha gust sin ina purziun truffels astga bugen dar si in'empustaziun da 2.5 kg (8.-), 5kg (15.-), 20 kg (55.-) ni schizun 50 kg (125.-) sut truffels@surrein.ch ni 077 488 95 50 e schar furnir quella a casa. Ils scolars selegran da voss'empustaziun!

Terms

1. da settember	controlla entras la dentista
7 - 11 da settember	in gi viadi da scola primara Trun
20 da settember	emprema S. Communiun
21 e 22 da settember	viadi d'atun scalem superiur
5 d'october	gi da prevenziun scalem superiur
6 - 8 d'october	gis da project scalem superiur
12 - 25 d'october	vacanzas d'atun
6 da november	rimnada da pupi Rabius
25 da november	gi da romontsch (scolars han liber)
23 da december	entschatta dallas vacanzas da Nadal

Contacts

Ils menaders da scola han suandonts temps da preschientscha:

gliendisgis suentermiezgi (omisdus)

mesjamna avonmiezgi (omisdus)

gievgia suentermiezgi (Salvatore Staglianò)

vendergis suentermiezgi (Caroline Demont-Albin)

Duront quels temps ein els contonschibels per telefon: 081 936 33 04

Adina contonschibels ein els per e-mail: meinascola@scolasumvitgtrun.ch

L'administraziun dil Consorzi da scola anfleis Vus ella casa da scola a Trun. Las uras da spurtegl ein per regla sco suonda:

gliendisgis: 08:00 - 12:00 e 13:30 - 16:00

margis: 08:00 - 12:00

En cass da maldispostadads astgeis Vus bugen tschintschar a nus sin pindella sut il numer 081 936 33 04

Las proximas novitads da scola cumparan il december!